

Sènt'Ugèna, varesc noscia ferides

La comunanza de Fascia à onorà sia sènta patrona con la messa e l moment convivial sun Ciaslir de Vich

Ai 16 de firé l é Sènt'Ugèna. L é n apuntament religious e zivil spetà da la comunanza de la val che ogne an la prea e la recorda con devozion. La ciampènes, sonèdes a man dal grop de voluntadives da Vich, envia jà la vea a se enjignèr per ge portèr onor, sun Ciaslir, tel santuarie che vèrda via duta la val. I fidei, con dantfora la crousc e i servidores, la bandieres de l'Union di Ladins de Fascia, de la Musega da Vich e di Scizeres, raprezentanc istituzionèi e di gropes de volontariat, se à enarloà entorn mesa les diesc da la capela de Vich per jir sun Ciaslir a messa grana. Te la veiora geja don Andrea Malfatti à ofizià la zelebrazion liturgica con don Mario Bravin e l diacon Antonio Ghetta, ciantèda a festa dal Cor de geja de Vich col didament de corisc da Soraga.

«Porton tedant da te, Sènt'Uiana, na val ferida – à dit don Andrea te la perdicia – tel corp e te l'anema. Te prejenton le feride del corp, chele lasciade dai evenc meteorologics de chest istà passà, la levina de la Marmolèda e la roes che à tocià i paijes del zenter Fascia, segn de na mencióna de la cura del Creat. E chele interiore desche la maxi operazion antidroga che moscia na val segnada dal materialism, dal individualism, dal vet valorial. Ma no cognon se lasciar destrameter. Chest pelegrinaje sa Sènt'Uiana l é l'ocajion per domandar aiut: Die ne speta, ne reiona, ne varesc.»

Don Andrea à dapò tout ca vèlch frasa de la ciantia Supereroi de Mr Rain prejentèda al Festival de Sanremo. «Jiré n pas tedant da te, disc la ciantia: Die l é semper con noi, l é Chel che ne disc che ogne nosc sfrijon l é ence so; 'doi goce de pievia che salva l mond', El l é l intervent divin, El ne recorda che la soula soluzion l é ge jir do; 'ogne outa che é tocià l fon, tu tu ere alò' no se salvon da soi ma demò con Crist. Ge domanon a Sènt'Uiana de varir dute nosce feride – à feni fora don Andrea – Gejù l é nosc soul supereroe che salva nosce vite e l mond.» Don Andrea à dapò ringrazià duc chi che ge é stat apede endèna la malatia e che ge à fat sentir so sostegn.

Endèna la zelebrazion l é stat let ju la orazioni di fidei per fascian dal Orazional e l Cor à feni fora co la ciantia «La Madonina del Vaiuto del Canori».

Do messa i paicenadores da Vich, che aea tacà jà bel bonora a descender fora l paisc, à fat sia paicenèdes dinlongia su l bosch e duc à podù scutèr la sonèdes de la Musega da Vich, cercèr i grostoi de la voluntadives da Vich e se tor i biliec per la loteria. La sègra de Sènt'Ugèna é stata coscita ence l'ocajion per fèr comunanza, se troèr a fèr cater ciacoles e na viva, dut momenc che deida tel spirit e te la fe.

Monica Cigolla



La jent se n arloa sun geja de Sènt'Ugèna.



Fernando Brunel, president de l'Union di Ladins, lec la orazioni a Sènt'Ugèna.



Don Andrea Malfatti à ofizià messa grana.